

Headlines

- 1 राष्ट्रपति द्रौपदी मुर्मू होरें साबका प्रधानमंत्रिण पी.वी.नरसिम्हा राव ते चौधरी चरण सिंह हुंदे अलावा कर्पूरी ठाकुर ते डॉ. एम. एस.स्वामीनाथन होरेंगी अज्ज मरणोपरांत भारत रत्न कन्नै सम्मानत कीता। प्रधानमंत्री नरेन्द्र मोदी होरें इनें सब्बनें विभूतिण गी श्रद्धांजलि अर्पित कीती ऐ।
- 2 लोकसभा चुनावं दे पैहले चरण लेई मेदवारी वापस लैने दा अज्ज खीरी ध्याड़ा हा। उधमपुर सीट लेई हुन कुल 12 मेदवार चुनावं मैदान च न।
- 3 भारती जनता पार्टी दे मेदवार जुगल किशोर शर्मा होरें अज्ज जम्मू संसदी हल्के लेई अपनी नामजदगी आले कागद दाखल करी दित्ते न।
- 4 भारती मौसम विभाग नै पूर्वोत्तर भारत दे इलाकें च बड़ी तेज बरखा ते गरज-चमक कन्ने बरखा बरने दे असार जताए न।

<><><><><><>

Bharat Ratan

राष्ट्रपति द्रौपदी मुर्मू होरें नमीं दिल्ली च राष्ट्रपति भवन च 2024 आले भारत रत्न पुरस्कार दित्ते। साबका प्रधानमंत्री चौधरी चरण सिंह ते पी.वी.नरसिम्हा राव, बिहार दे साबका मुख्मन्त्री कर्पूरी ठाकुर ते महान वैज्ञानिक एम.एस.स्वामीनाथन होरें गी मरणोपरांत भारत रत्न पुरस्कार दित्ता गेआ। राष्ट्रपति होर कल नमीं दिल्ली च साबका उप-प्रधानमंत्री ते बीजेपी दे नेता एल. के.आडवाणी होरें गी सर्वोच्च नागरिक सम्मान प्रधान करगन। अज्ज बडलै अलंकरण समारोह दरान पुरस्कार जेत्तुणं दे नेड़में रिश्तेदारें एह पुरस्कार हासल कीते। उपराष्ट्रपति जगदीप धनखड़, प्रधानमंत्री नरेन्द्र मोदी, केन्द्रीय गृह मंत्री अमित शाह, कांग्रेस अध्यक्ष मल्लिकार्जुन खड़गे, विदेश मंत्री डॉ. एस.जयशंकर, बिहार दे मुख्मन्त्री नितिश कुमार ते होरने मन्नी-परम्मनी दी हस्तियां उत्थें मजूद हे।

<><><><><><>

PM-Bharat Rattan

प्रधानमंत्री नरेन्द्र मोदी होरें राष्ट्रपति द्रौपदी मुर्मू हुंदे आस्सेआ भारत रत्न पुरस्कार सम्मानत जेत्तुणं दे दित्ते दे योगदान गी चेता कीता ते साबका प्रधानमंत्री पी.वी.नरसिम्हा राव, चरण सिंह ते होरनें गी श्रद्धांजलि दित्ती। उनें आक्खेआ जे पी.वी.नरसिम्हा राव होरें जेहड़ा किश बी राष्ट्र लेई कीता, ओह हर भारतीय नै संजोए दा ऐ ते एह मानै आली गल्ल ऐ जे उनेंगी भारत रत्न पुरस्कार दित्ता गेआ। उनें आक्खेआ जेच रण सिंह होरें गी भारत रत्न, उंदा भारत दे विकास, खास करियै राई-बाई, ते ग्रामीण विकास ताई उंदे दित्ते दे योगदान गी मानता देना ऐ।

<><><><><><>

Nomination

आँदे लोकसभा चुनावं दे पैहले गेड़ लेई नामांकन पत्रें गी वापस लैने दा अज्ज खीरी ध्याड़ा ऐ। जम्मू कश्मीर दी उधमपुर सीट उप्पर इस्सै गेड़ च 19 अप्रैल गी चुनावं होंगन। बुधवार गी नामांकन भरने दा खीरी ध्याड़ा हा ते कल इनें नामांकन पत्रें दी जांच कीती गई। आकाशवाणी संवाददाता मूजब चुनावं लेई कुल 15 मेदवारें अपने नामांकन पत्र भरे हे, मगरा जांच दे परैत त्रै मेदवारें दे पत्रें गी खारज करी दित्ता गेआ। हुन अजे तोड़ी शड़े 12 मेदवार अपनी किस्मत गी चुनावं च अजमांगन। इत्थें एह दस्सना लाजमी ऐ जे उधमपुर-कठुआ-डोडा सीट थमां मुख्म मकाबला बीजेपी दे इसलै दे सांसद ते केन्द्री राज्य मंत्री डॉ. जितेन्द्र सिंह ते साबका सांसद ते कांग्रेस दी सरकार च मंत्री रेई चुके दे चौधरी लाल सिंह बश्कार ऐ। पैहले गेड़ च 17 राज्यें ते 4 केन्द्र शासत प्रदेशें दिणं 102 लोकसभा सीटें परा 19 अप्रैल गी चुनावं होंगन।

<><><><><><>

BJP-Jugal

जम्मू-रियासी सीट लेई बीजेपी दे मेदवार जुगल किशोर शर्मा होर अज्ज नामांकन दाखल कीता। केन्द्री मंत्री अनुराग सिंह ठाकुर ते प्रदेश बीजेपी दे होर दुए नेता बी इस मौके उत्थें मजूद हे। जुगल किशोर शर्मा होरें अपनी नामजदगी आले कागज

दाखल करने शा पैहले इंदिरा चौक थमां लेइयै डी.सी.दफतरै तोड़ी इक बड्डी रैली बी कड्डी। नामांकन दाखल करने परैत शर्मा होरें शहीदी चौक च स्कूली परिसर दे नेड़े बी इक रैली कीती।

<><><><><><>

BJP-Manifesto

भारतीय जनता पार्टी अध्यक्ष जे.पी.नड्डा होरें औंदे लोकसभा चुनाएं लेई चुनावी घोषणा पत्र समिति दी घोषणा कीती। 27 मिनबरी कमेटी दी अध्यक्षता वरिष्ठ बीजेपी नेता ते केन्द्री मंत्री राजनाथ सिंह होर करगन। वरिष्ठ बीजेपी नेता निर्मला सीतारमण होर कनवरनर होंगन ते पियूष गोयल होर सह-कनवरनर होंगन।

<><><><><><>

Farooq India

नैशनल कांफ्रेंस दे प्रधान डॉ. फारूक अब्दुल्ला होर कल दिल्ली दे रामलीला मैदान च INDI गठबंधन दी लोकतंत्र बचाओ रैली च शामिल होंगन। नैशनल कांफ्रेंस दे उप-प्रधान उमर अब्दुल्ला होरें गलाया ऐ जे कल रामलीला मैदान च होने आले INDI गठबंधन दे प्रोग्राम च नैशनल कांफ्रेंस दे प्रधान डॉ. अब्दुल्ला होर शिरकत करगन। लोकसभा चुनाएं लेई मेदवारें दे नांह घोषत करने बारे उमर अब्दुल्ला होरें आखेआ जे ओह स्हेड समें पर अपने मेदवारें दे नाएं दी घोषणा करी देंगन।

<><><><><><>

Drug Property

जम्मू कश्मीर पुलस नै अज्ज एनडीपीएस कनून तैहत जिला बारामुला च इक नशीले पदार्थ दे तस्कर दे रिहाइशी मकान गी सील करी दित्ता। इस मकान दी कीमत कोई 30 लख रपे ऐ जेहड़ा उड़ी दे दरदकोट च स्थित ऐ। पुलस दे इक प्रवक्ता नै दस्सेआ जे नशीले पदार्थ दा तस्कर अजाद अहमद मीर उड़ी दे दरदकोट दा बसनीक ऐ ते ओह इस घर दा मालक ऐ। उनें दस्सेआ जे पुलस आस्सेआ जांच-पड़ताल दरान पता लग्गा जे एह सम्पत्ति उनै गैर कनूनी तरीके नै कमाई ही।

<><><><><><>

Search Rajouri

बन्ने आले जिले राजौरी दे इक अगेत्रे इलाके च संदिग्ध नकलो-हरकत दियां रिपोर्टां थोने परैत सुरक्षाबलें आस्सेआ इलाके च व्यापक तपाशी अभियान चलाया गेआ। अधिकारिएं मूजब फौज ते जम्मू कश्मीर पुलस आस्सेआ धर्मसाल इलाके दे बरेवी बाजीमाल ते छरंगल-काबुकोट च सांझे तौर पर तपाशी अभियान रम्भेआ गेआ। हासल जानकारी मूजब बरेवी बाजीमाल च इक कुदरती गुफा दी तलाशी दरान सुरक्षाबलें किश राउंद बी दागे पर उत्थें किश बी बरामद नेई होआ।

<><><><><><>

Lajja Manhas(bytes)

मन्नी-परमन्नी दिएं डोगरी समाचार वाचक लज्जा मन्हास हुंदा जंदी रातीं काल होई गेआ। ओह सन् 1971 च आकाशवाणी जम्मू च नियुक्त होने आले सब्बनें शा पैहले समाचार वाचकें चा इक हियां ते ओह तकरीबन 4 दहाकें तगर डोगरी खबरें लेई इक लोकप्रिय आवाज बनी दियां रेहियां। अज्ज उंदा खीरी संस्कार करी दित्ता गेआ। बरे 2021 च क्षेत्रीय समाचार एकांश जम्मू दे गोल्डन जुबली कार्यक्रम दरान श्रीमती लज्जा मन्हास होरें अपने बचार सांझे कीते हे। उनें आखेआ हा आकाशवाणी कन्ने जुड़ी दिएं केई शख्सियतें ते होरनें लोकें बी लज्जा मन्हास हुंदा काल होई जाने पर दुख ते बसोस जताया ऐ। इस बारे च आओ उनें गी सनाने आं पद्मश्री डॉ. जितेन्द्र उधमपुरी होरें केह आखेआ ऐ.....बाईट

<><><><><><>

India Foreign Exchange

22 मार्च गी हफते दे खीरे दरान भारती विदेशी मुद्रा भंडार 140 मीलियन डॉलर बधियै हुनै तोड़ी दे उच्चतम स्तर 642.631 बिलियन डॉलर तोड़ी पुज्जी गेआ। भारती रिजर्व नै जानकारी जारी करदे होई आखेआ जे एह पूरे पराते भंडार च बढ़ोतरी दा लगातार 5मां हफता ऐ। पिछले हफते भंडार च 6.396 डॉलर थमां 842.492 बिलियन डॉलर दा बाद्धा होआ ऐ। हफते दरान सुन्ने दे भंडार च 347 मीलियन डॉलर थमां 51.487 बिलियन डॉलर दा बाद्धा होआ ऐ। विदेशी मुद्रा संपत्ति पूरे पराते भंडार दा इक बड्डा हिस्सा ऐ। जेहड़ा जे 123 मिलियन डॉलर थमां 568.264 बिलियन डॉलर घट्ट होआ ऐ। विदेशी मुद्रा परिसंपत्ति च गैर

अमरीकी इकाइएँ दी मुल्य घट्ट करने जां नेई करने दे असर तांई जियां जे यूरो, पाउंड ते यैन गी विदेशी मुद्रा भंडार च रक्खेआ गेआ ऐ।

<><><><><><>

Indian Navy

भारती नौसेना नै अरब सागर च 12 घैंटे तगर चले दे अभियान च 23 पाकिस्तानी बसनीकें गी सोमाली समुंद्री लुटेरें थमां बचाया ऐ। भारती नौसैनिक बलें अपनी महारथ ते रणनीतिक तालमेल दा इस्तेमाल करदे होई समुंद्री डकैतें दे कन्नै गल्लबात शुरू कीती ते बिजन खून-खराबे दे उनेंगी आत्म-समर्पण लेई मजबूर करी दित्ता। एह कामयाब अभियान समुंद्री डकैती दी घटनाएं कन्ने निबडने ते इलाके च समुंद्री गतिविधिएं दी सुरक्षा जकीनी बनाने च भारती नौसेना दी निर्णायक जित्त दा प्रतीक ऐ।

<><><><><><>

IMD

भारती मौसम विभाग नै अज्जै थमां पूर्वोत्तर भारत दे इलाकें च तेज बरखा ते गरज-चमक कन्नै बरखा बरने दी पेशगोई कीती ऐ। मौसम विभाग नै उत्तर-पच्छमी भारत दे हिस्सें च कल्लै तोड़ी हौली थमां दरम्याने दर्जे दी बरखा ते हिमालयन खित्ते च कुतै-कुतै बडी भारी बरखा दे बी असार जताए न। विभाग मुजब अज्ज जम्मू कश्मीर, लद्दाख, गिलगित, मुजफ्फराबाद, हिमाचल प्रदेश ते उत्तराखंड च केई थाहरें पर भारी बरखा ते बर्फबारी दे बी असार न। मौसम विभाग नै इब्बी आखेआ ऐ जे अरुणाचल प्रदेश, असम ते मेघालय च बी कुतै-कुतै भारी बरखा ते बर्फबारी होई सकदी ऐ। एह्दे अलावा ओडीशा, पच्छिम बंगाल दे किश हिस्सें, झारखंड ते बिहार च कुतै-कुतै हौली थमां दरम्याने दर्जे दी बरखा दी पेशगोई कीती गई ऐ।

<><><><><><>